

Тайынша Мәңгі

Тайынша аудандық қоғамдық-саяси газеті
2006 жылдың 3 ақпанынан шыға бастады

№ 16 (868) 8 сәуір, жұма 2022 жыл

facebook.com/tainsha.tany



http://tainshatany.kz



tainsha_tan@list.ru

МЕМЛЕКЕТТІК ҚЫЗМЕТТЕГІ ЖАСТАР

Еліміздің тәуелсіздігін алған кезден бастап, өркендеген Қазақстанның даму тарихы табысты мемлекет тиімді мемлекеттік басқару негізінде ғана құрылуы мүмкін екенін көрсетті.

Еліміздің Конституциясында барлық азаматтарға мемлекеттік қызметке тең қолжетімділікке кепілдік берілген.

Мемлекеттік міндеттерді іске асыру үшін қажетті сандық құрамнан басқа адами капиталдың сапасы ерекше мәнге ие.

Бүгінгі таңда облыста 29 жасқа дейінгі жастардың 14% мемлекеттік қызметте жұмыс істейді.

Мемлекеттік қызметті дәріптеу мақсатында имидждік іс-шаралар, оң жетістіктерді жариялау, мемлекеттік қызметшілер арасында шығармашылық байқаулар өткізілетіндігін атап өткен жөн. Ағымдағы жылы «Мемлекеттік қызмет мектебі» жобасының 7-ші маусымы іске асырылды, оны 2018 жылдың басынан бастап Мемлекеттік қызмет істері агенттігінің Департаменті Мемлекеттік басқару академиясының облыстық филиалымен бірлесіп жыл сайын мемлекеттік қызметке орналасу үшін әлеуетті үміткерлерді дайындау, жастарды патриоттыққа тәрбиелеу мақсатында ұйымдастырады.

Студенттер тарапынан мектепке деген қызығушылық үнемі артып келеді.

Мысалы, ағымдағы жылдың ақпан айында аяқталған 7 маусымда Солтүстік Қазақстан университетінің түрлі мамандықтары бойынша оқитын 16 студенті қатысты. Маусым қорытындысы бойынша жобаның сәтті өткендігін растайтын сертификаттар табысты.

Жобада екі кезең қарастырылған: теориялық және практикалық бөлімдер.

Өз кезегінде, бірінші кезеңде Академия филиалының оқытушылар құрамы мен мемлекеттік қызметшілер өткізетін онлайн форматта оқу орны түлектерінің сабақтарға қатысуы ұйымдастырылды.

Курстар тыңдаушыларды заңнама негіздерімен таныстыруға, сондай-ақ жеке қасиеттерін, қажетті құзыреттерін дамытуға бағытталған.

Теориялық бөлімді аяқтағаннан кейін студенттерге аймақтық мемлекеттік органдарында оқу практикасымен қоса тағылымдамадан өту мүмкіндігі беріледі, содан кейін студенттер мемлекеттік қызметке орналасу үшін тестілеуден өтеді. Әрине, бұл жобаның барлық қатысушылары талантты және қабілетті үміткерлер, әлеуетті кандидаттар.

Осындай мысалдардың бірі - 6-шы маусымдағы Мемлекеттік қызмет мектебі жобасының түлегі Диана Жанғазина.

Диана 1999 жылы 19 қарашада Солтүстік Қазақстан облысының Петропавл қаласында дүниеге келген. № 43 қалалық орта мектепті бітіріп, 2017 жылы Манап Қозыбаев атындағы Солтүстік Қазақстан университетіне «құқықтану» мамандығы бойынша оқуға түсті.

2021 жылы университеттегі оқуын сәтті аяқтап, Д.Жанғазина конкурстық іріктеуге қатысып, «Петропавл қаласы әкімдігінің тұрғын үй инспекциясы бөлімі» КММ-де бас маман лауазымына жұмысқа орналасты.

Жас қызметші тұрғын үй қорын басқару, газбен жабдықтау саласындағы бақылау және мониторинг, сондай-ақ бөлімнің құзыретіне жататын басқа да мәселелер сияқты жауапты функцияларды орындайды. Алғашқы жұмыс күнінен бастап Диана өзін тәртіпті және атқарушы қызметкер ретінде көрсетті.

Әңгімелесу барысында тұрғын үй инспекциясы бөлімінің бас маманы «Мемлекеттік қызметке кіру кезінде үміткер кәсіби қызметті тиімді орындау үшін қажетті білім мен дағдылардың жиынтығына ие болуы тиіс. Ең алдымен, жұмыстың тиімділігі пайдалы болуға деген ұмтылыс пен тілекке байланысты» екендігін атап өтті.

Жанғазина Диана жан-жақты және талантты адам, өзін-өзі дамытуға уақыт бөледі. Сонымен қатар, бұрын бойжеткен «Лаула» вокалдық тобының солисті болған, қала мен облыстың түрлі концерттік іс-шараларына қатысқан.

Оның хоббиінің бірі спорт және жас қызметші мойындағандай, ол вокалды жақсы көреді: «Мен ән салғанды ұнатамын, одан жарқын сезімдерді сезінемін». Бос уақытын отбасымен және жақындарымен өткізгенді ұнатады.

Дианың болашаққа жоспарлары өте көп, және, әрине, ең жағымды қасиеттердің арқасында ол міндетті түрде мақсаттарына жетеді.

Жас қызметшілер мемлекеттік қызметші мәртебесін алу тек құрмет пен өзін маман ретінде іске асыру мүмкіндігі ғана емес, сонымен бірге бұл өз тағдырын сеніп тапсыратын және мемлекеттік басқару өкілдерінің құзыреттілігі мен кәсібилігіне сенетін адамдарға қызмет ету екенін есте ұстауы керек.

Гүлмира ҚАСИЕНОВА,

Мемлекеттік қызмет істері агенттігінің СҚО бойынша департаментінің Мемлекеттік қызмет басқармасының бас маманы.

Үкімет

ТҰРҒЫНДАРДЫ МАЗАЛАҒАН МӘСЕЛЕ ЖҮЙЕЛІ ШЕШІЛУГЕ ТИІС

Сәуірдің 6 жұлдызында Мәжіліс спикері Ерлан Қошановтың төрағалығымен Палатаның жалпы отырысы өтті. Жұмыс барысында депутаттар өңірлерге сапары кезінде тұрғындардан келіп түскен өтініштерді қарау нәтижелері бойынша Үкіметтің ақпаратын тыңдады. Отырысқа Премьер-Министрдің орынбасары Ералы Тоғжанов бастаған бірқатар Үкімет мүшелері арнайы келді.

ӘР МӘСЕЛЕНІҢ АРТЫНДА АДАМ ТАҒДЫРЫ ТҰР

Отырыста Мәжіліс төрағасы Ерлан Қошанов Мемлекет басшысы депутаттардың өңірлердегі өзекті әлеуметтік мәселелерді шешуге атсалысуын күшейту жөнінде тапсырма бергенін атап өтті. Депутаттар еліміздің барлық өңіріне барып, сайлаушылармен 1600-ге жуық кездесу өткізді. Олар түрлі әлеуметтік нысандарда, кәсіпорындар мен базарларда, шалғай елді мекендерде болып, еңбек ұжымдарының проблемаларымен танысты. Барлығы мыңнан астам мәселе жинақталып, Үкіметке жіберілді. Соның ішінде азық-түлік пен дәрі-дәрмектің қымбаттауы, ауыз сумен және тұрғын үймен қамтамасыз ету, мектеп құрылысы, жол жөндеу, интернет сапасын жақсарту мәселелері бар. Мәжіліс Төрағасының айтуынша, проблемалардың бәрі нақты әрі жүйелі түрде шешілуге тиіс. Оларды депутаттар жіті бақылауына алмақ.

«Әрбір мәселенің артында адамдардың тұрмысы мен тағдыры тұр. Осыны әр депутат, министр мен жергілікті билік өкілдері терең түсінуге тиіс», - деді Ерлан Қошанов. Сондай-ақ Палата спикері Парламент пен Үкіметтің мәселелерді шешу бойынша жаңа форматтағы жұмысы алдағы уақытта да жүйелі түрде жалғасатынын айтты. Бұдан кейін депутаттарға келіп түскен азаматтардың өтініштерін мемлекеттік органдардың қарау нәтижелері туралы Премьер-Министрдің орынбасары Ералы Тоғжанов баяндап берді.

«Қазіргі таңда Үкімет тарапынан Мәжіліс депутаттарымен тығыз байланыста жұмыс істеу дәстүрге айналды. Өздеріңізге белгілі, Үкімет Аманат фракциясымен партияның бағдарламасын іске асыру бағытында қоян-қолтық жұмыс істеп келеді. Депутаттардың өңірге сапары алдында «Жаңа Қазақстан» тобымен кездесіп, бірқатар өзекті мәселені бірге қарағанбыз. Бұдан бөлек, Үкіметте Қазақстан халық партиясының, «Ақжол» партиясының фракцияларымен жеке кездесулер өткізіп, сайлаушыларды толғандырып жүрген мәселелер бойынша нақты жұмыс бағыттарын айқындадық», - деді Е.Тоғжанов.

Осы орайда Премьер-Министрдің орынбасары депутаттардың өңірлерге сапарлары барысында көтерілген екі мыңға жуық сұрақ Үкімет тарапынан жан-жақты сарапталып, қаралғанын жеткізді. Осы мәселелердің негізгі тақырыбы Үкіметке азаматтардан тікелей келіп түскен 1800 өтініште баяндалған талап-тілектермен сәйкес келіп отыр. «Бұл өңір тұрғындары шешімін күтіп тұрған өзекті мәселелер. Оларға қатысты мемлекеттік аппараттың жан-жақты зерделенген шешімі қажет. Бұл сұрақтардың шешімі бүгінгі отырысқа қатысып отырған Үкімет мүшелері жұмысының күн тәртібіне енгізіліп, министрлердің өңірлерге сапарлары аясында нақты қаралады. Бұл бағытта депутаттық корпусы бірлесе жұмыс істеуге шақырамыз. Осы орайда «Жаңа Қазақстанның күн тәртібі – азаматтардың әл-ауқатын арттыру, табыс тапшылығын жою, жұмыс орындарын құру және инфляцияны тежеу» деген Мемлекет басшысының сөзі алдымызда тұрған негізгі міндет екенін атап өткім келеді», деді Е.Тоғжанов.

БАСТЫ БАҒЫТ – ТАБЫСТЫ АРТТЫРЫП, КЕДЕЙЛІКТІ ТӨМЕНДЕТУ

Премьер-Министрдің орынбасары тұрғындар тарапынан туындаған сұрақтарға кеңінен тоқталды.

«Сұрақтардың негізгі блогы нақты табысты арттыруға, кедейлік деңгейін төмендетуге бағытталған. Өздеріңізге белгілі, пандемия, жаһандық экономикалық дағдарыс халық кірісінің төмендеуіне әсер етті. Мемлекет басшысының тапсырмасына сәйкес әзірленген Халық табысын арттыру бағдарламасында азаматтар кірісін көтеруге бағытталған нақты шаралар қарастырылған», деді Е.Тоғжанов. Спикердің айтуынша, біріншіден бюджет саласы және квазимемлекеттік сектордың 1 млн-нан аса қызметкерінің, сондай-ақ мемлекеттен қолдау алатын бизнестің 2,8 млн жұмысшысының жалақысын көтеру қажет. Екіншіден, экономиканың барлық саласында жаңадан ашылатын 2 млн жұмыс орынының табысын арттыру керек. Соның ішінде бұрын сырттан әкелінген, өндірісте сұранысқа ие тауарлардың 19 түрі бойынша жаңа кәсіпорындар құру жоспары бар. Фармацевтика, биотехнология, IT-технология және мұнай-химия саласында шикізаты жоғары 5-ші және 6-шы деңгейде өңдеуге негізделген өңдеуші өнеркәсіпті дамыту арқылы іске асырылады.

Үшіншіден, ірі кәсіпорындар айналасында шағын және орта бизнес белдеуін құру арқылы кәсіпкерліктен түсетін табысты арттыру көзделді. Бұл бүгін көтеріліп отырған сұрақтар емес. Талай елдің көкейінде жүрген мәселелер. Төртіншіден, «Бақытты отбасы» секілді жобалар арқылы көпбалалы және мүгедек бала тәрбиелеп отырған аналарға жыл сайын 20 мың жұмыс орнын құру қажет.



ҮКІМЕТ
ОТЫРЫСЫ

«Жастар практикасы», «Бірінші жұмыс орны» жобалары және гранттар беру арқылы 160 мың жасты жұмысқа тарту қарастырылған.

Қоғам жиі назар аударатын мәселелердің бірі – экология. Бүгінгі таңда бұл бағытта экobelсенділермен бірлесіп 485 іс-шараны қамтитын 17 жол картасы іске асырылып жатыр. Оның ішінде «Жасыл Қазақстан» ұлттық жобасы аясында 16 ірі өнеркәсіптік объект эмиссияларды 20-дан 30 пайызға дейін төмендету бойынша міндеттемелер қабылдады.

Сондай-ақ Премьер-Министрдің орынбасары депутаттық корпусының назарындағы басым бағыттардың бірі әлеуметтік салаға тоқталды. Оның айтуынша, халықты әлеуметтік қамсыздандыруға 4 трлн теңге қарастырылған. Бұл былтырғы сомамен салыстырғанда 230 млрд теңгеге артық.

«Әлеуметтік саладағы өзекті мәселелердің бірі – аз қамтылған отбасылардың жағдайы. Біз күнөріс деңгейі кедейлік шегінен төмен отбасыларға атаулы әлеуметтік көмек көрсетеміз. Бүгінде осындай көмекті 95 мың отбасы алып отыр. Азаматтардың талап-тілектері ескеріліп 2020 жылы атаулы көмекті тағайындау механизмі өзгертіліп, 25 табыс түрлері мен әлеуметтік төлемдер алынып тасталды. Көмек алушыларды еңбекке ынталандыру тәсілдері енгізілді. Егер еңбекке қабілетті азаматтар ұсынылған жұмыстан бас тартса атаулы көмек 6 айға тоқтатылады. Бұл атаулы әлеуметтік көмектің масылдыққа айналуына жол бермеуге бағытталған. Атаулы көмек – табысы жан жақты тексеріле отырып, тұрмысы кедейлік шегінен төмен отбасыларға ғана тағайындалатын мемлекеттік қолдау. Бұл ретте Үкімет тарапынан мемлекеттік қолдауды қажет ететін отбасыларды тұрақты қамқорлыққа алып, қажет кезінде проактивті форматта көмек көрсету үшін мемлекеттік органдардың 20 цифрлы қосымшасын интеграциялау арқылы Отбасының цифрлы картасы әзірленеді», деді Е.Тоғжанов.

«Жалпы, көктемгі дала жұмыстарын жүргізуге нарықтық құнынан 12-15 пайызға төмен бағамен 400,2 мың тонна бөлінді. Бұл 2021 жылмен салыстырғанда 20 мың тоннаға артық. Отандық тауар өндірушілер тұқым материалымен қамтамасыз етілді. 2,3 млн тонна тұқым немесе жоспардың 100 пайызы қамтылды. Сұрып жаңарту мақсатында Ресей Федерациясынан тұқым материалын жеткізу мәселесі пысықталды. Келіссөздер жүргізіліп, тұқымдарды шығаруға салынған шектеулер алынып тасталды. Минералды тыңайтқыштарға келсек, Үкімет қолдауының арқасында диқан-дардың қажеттіліктерін қанағаттандыру мақсатында отандық минералды тыңайтқыштарды өндірушілермен уағдаластыққа қол жеткізілді. Бұл ретте аммиак селитрасының бағасы 200 мың теңгеден 160 мың теңгеге дейін төмендетілді», деді министр.

Ведомство басшысы агроөнеркәсіптік кешен саласында субсидиялаудың жаңа тетігі 2023 жылы енгізілетінін атап өтті. Оның айтуынша, көкөністер мен қант қызылшасын өндіру мен өңдеу жөніндегі инвестициялық жобаларды іске асыруға қосымша 8,3 млрд теңге бөлінеді. Бұл қаражат заманауи суару жүйелерін сатып алуға, қажетті инфрақұрылым тартуға жұмсалмақ.

«Сондай-ақ ауыл халқының табысын арттыру жөніндегі жобаның ауқымын ұлғайту аясында өз бизнесін ашу және ісін жаңа бастаған кәсіпкерлердің қызметін кеңейту мақсатында ауылдық елді мекендер мен шағын қалалардың тұрғындарына микрокредит беруге 40 млрд теңге бөлу жоспарланған. Бұл ең кемінде 8 мың жұмыс орнын құруға мүмкіндік береді.

Бұдан бөлек, жалпы отырыста депутаттар «Қазақстан Республикасының кейбір заңнамалық актілеріне атқарушылық іс жүргізуді жетілдіру мәселелері бойынша өзгерістер мен толықтырулар енгізу туралы» заң жобасын бірінші оқылымда мақұлдады. Құжатта атқарушылық іс жүргізу мәселелері бойынша заңнамалық актілердегі олқылықтарды, коллизиялар мен қайшылықтарды, сондай-ақ сыбайлас жемқорлық көріністеріне ықпал ететін нормаларды жою көзделген.

Абай Отар,
Egemen Qazaqstan

ҚҰЖАТТАРЫН ӨНДЕУ БОЙЫНША
АТҚАРЫЛҒАН ЖҰМЫСТАР

«Солтүстік Қазақстан облысы әкімдігінің мәдениет, тілдерді дамыту және архив ісі басқармасының Солтүстік Қазақстан Мемлекеттік архиві» КММ Тайынша аудандық филиалының мұрағатшылары «Тайынша ауданының білім бөлімі» КММ құжаттарын ғылыми-техникалық өңдеу, атап айтқанда Тайынша ауданы мектептерінің құжаттарын өңдеу бойынша жұмыстары жүргізілуде.

Аудандарды ұйымдастырылуына байланысты 1934 жылы Красноармейск аудандық халық ағарту бөлімі, 1939 жылы Чкалов аудандық халық ағарту бөлімі, 1936 жылы Келлер аудандық халық ағарту бөлімі ұйымдастырылды.

Сол кезден бастап ауданның тұрғындары халықтың сауатсыздығын жоюға үлкен қадам жасады. Мектептегі білім беру нысандары әртүрлі болды, олардың көпшілігі бастапқыда бастауыш және жеті жылдық болды. Мұрағат деректеріне сүйенсек, шамамен 1970 жылдан бастап оқыту түрі міндетті сегіз жылдық білім беруге көшкен. Сегізжылдық мектеп түлектері 9-10 сыныптар аралығында толық орта мектептерде оқуын жалғастыра алатын. Сонымен қатар, мектептерде ұзартылған күн топтары, кешкі, күндізгі және сырттай оқу мектептері, мектеп аралық оқу-өндірістік базалар ашылды, мектептерде интернаттар да жұмыс істеді. Ашылған мектептер халықтың көп ұлтты құрамына үн қосты. Қазақ, орыс, неміс тілдерінде мектептер ашылды. 1987 жылдан бастап жаңа форманың нәтижесінде, 11 жылдық білім беру төртінші сыныптан бастап, бір жыл бұрын барлық сыныптарды ауыстыру арқылы енгізілді. Тәуелсіздік алғаннан кейін білім беруді дамытудың жаңа тәсілдері қалыптаса бастады. ҚР Президентінің 1997 жылғы 2 мамырдағы Жарлығымен Чкалов, Келлер және Красноармейск аудандары таратылып, аудандық білім бөлімдері бір Тайынша аудандық білім бөліміне біріктірілді. Құжаттарды өңдеу барысында тарихтың ұмытылған деректері кездеседі. Құжаттардың табиғаты басқаша болды. Бұйрықтар мәтіндерін, педагогикалық кеңестер мәжілістерінің хаттамаларын ұсыну формасы оқушыларды адамгершілік, кеңестік патриотизм және пролетарлық интернационализм негізінде тәрбиелеудің қалыптасқан уақыт рухын көрсетеді. Оқушылар аудан өміріне, әсіресе дала жұмыстары кезінде: картоп егу мен жинауға, ағаштар мен бұталарды отырғызуға, шөп пен жем-шөп жинауға белсене қатысты. Оқушылар арасында, мысалы, металл сынықтарын немесе макулатураны көбірек жинайтындар арасында жарыстар өткізілді. Нәтижелері жергілікті газеттерде жиі жарияланды. Бұл оқушыларды бірнеше рет осындай жарыстарға қатысуға ынталандырды. Балаларды еңбекке осылай таныстырды.

Содан бері талай уақыт өтті. Білім беру жүйесі үнемі дамып отырады, өйткені оқытудың әдістерін, принциптерін, тәсілдерін жетілдіру қажет. Бірақ мақсат әрқашан бір: оқушылардың білім деңгейін көтеру.

Аты тек мұрағат құжаттарында ғана кездесетін бірнеше мектептерді атап өткім келеді: Севастополь орта мектебі, Белоярская орта мектебі, Золоторунная негізгі мектебі, Талдықөл негізгі мектебі, Сүгірбай негізгі мектебі, Новоберёзовская негізгі мектебі, Авраамская орта мектебі, Розовская бастауыш мектебі, Южная бастауыш мектебі мектеп, Ворошилов бастауыш мектебі, Богатырская бастауыш мектебі, т.б.

Барлық мектептер құжаттарды толық сақтай алмады. Мектептер құрылған кезден бастап құжаттар көп емес. Яснополянская орта мектебі, Летовочная орта мектебі, Краснополянская орта мектебі, Зеленогай орта мектебі, Алаботинская орта мектебі, Краснокаменская негізгі мектебі, Любимовская бастауыш мектебі, Макашевская орта мектебі, Большеизюмовская орта мектебі, Горький орта мектебі, Донецкая орта мектебі, Дашкониколаевская негізгі мектебі, Зареченская бастауыш мектебі, Ильичевская орта мектебі, Ильичевская негізгі мектебі, Калиновка негізгі мектебі, Келлерорта мектебі, Киров орта мектебі, Краснодарльск негізгі мектебі, Краснокиев орта мектебі, Чермошнянская орта мектебі, Подлесная орта мектебі сияқты мектептерде құжаттар толығымен дерлік және өте жақсы жағдайда тапсырылды.

Көбінесе құжаттар мұрағат ісі саласында «Мұрағаттық анықтамаларды, мұрағаттық құжаттардың көшірмелерін немесе мұрағаттық үзінділер беру» мемлекеттік қызметтерін көрсету үшін пайдаланылады. Біздің мақсатымыз – қызмет алушыларға ғана емес, тарихты бірте-бірте жинайтындарға өте қажет және маңызды құжаттарды сақтау.

Оксана ЕСМУХАНОВА, мұрағатшы.

ҰЛТТЫҚ БАЯНДАМА
ЖАРИЯЛАНДЫСЫБАЙЛАС ЖЕМҚОРЛЫҚҚА ҚАРСЫ
ІС-ҚИМЫЛ ЖӨНІНДЕГІ
ҰЛТТЫҚ БАЯНДАМА

Құжаттың мақсаты қоғамды 2021 жылы Қазақстанның сыбайлас жемқорлыққа қарсы саясатын іске асыру нәтижелері туралы хабардар ету болып табылады. Сыбайлас жемқорлыққа қарсы іс-қимыл жөніндегі уәкілетті органның, сондай-ақ басқа да мемлекеттік органдардың, квазимемлекеттік сектор субъектілері мен жұртшылықтың осы бағыттағы жұмысы баяндалды.

Сыбайлас жемқорлыққа қарсы ағарту, сыбайлас жемқорлықтың алдын алу, қоғаммен әріптестік, жауапкершіліктің бұлтартпастығы бойынша қабылданған заңнамалық және практикалық шаралар, сондай-ақ БҰҰ Сыбайлас жемқорлыққа қарсы Конвенциясының ережелерін, Еуропа ГРЕКО Кеңесінің басшылық қағидаттарын және ЭЫДҰ ұсынымдарын ескере отырып, сыбайлас жемқорлыққа қарсы саясатты одан әрі жетілдіру жөніндегі ұсыныстар ұсынылды. Сондай-ақ, Қазақстанның сыбайлас жемқорлыққа қарсы саясат мәселелерінде халықаралық ынтымақтастық бойынша күш-жігері, сондай-ақ елде және әлемде сыбайлас жемқорлықты қабылдау деңгейін тәуелсіз бағалау қорытындылары көрініс тапты.

Ұлттық баяндамада Президенттің 2022 жылғы 2 ақпандағы Жарлығымен бекітілген Қазақстан Республикасында 2022-2026 жылдарға арналған сыбайлас жемқорлыққа қарсы саясат Тұжырымдамасына және оны іске асыру жөніндегі іс-қимыл жоспарына назар аударылды.

Құжат мемлекеттік қызметкерлерге, сарапшыларға, рейтингтік агенттіктерге, қоғам қайраткерлеріне, ғалымдарға және басқа да мүдделі тұлғаларға қызықты әрі пайдалы болады.

Ұлттық баяндаманың толық мәтінін мына сілтеме бойынша оқи аласыздар:

<https://www.gov.kz/memleket/entities/anticorruption/documents/details/283483?lang=kk>

«ANTIKOR ORTALYĞY»
ӨЗ ЖҰМЫСЫН БАСТАДЫ

«Antikor ortalygy» жемқорлық мәселелері бойынша азаматтарды қабылдау алаңы болып табылады. Antikor ortalygy-ның мақсаты азаматтарды кедергісіз қабылдау және олардың өтініштері бойынша жедел шаралар қабылдау үшін қолайлы жағдай жасау болса, міндеттері жеке және заңды тұлғалардың құқықтарын, бостандықтарын мен заңды мүдделерін қорғау.

Antikor ortalygy-ның функциялары:

- жеке тұлғаларды және заңды тұлғаларды қабылдау;
- уәкілетті органдар мен сотқа жүгінуде жеке тұлғаларға және заңды тұлғалардың өкілдеріне консультация беру және жәрдем көрсету;

- жемқорлыққа қарсы іс-қимыл саласындағы сыбайлас жемқорлыққа қарсы саясат пен құқықтық нормаларды түсіндіру.

Орталықтың жұмыс уақыты: дс-жм, сағ. 09:00-ден 17:00-ге дейін.

Мекен-жай: Петропавл қаласы, Интернационал көшесі, 60 үй. тел 8/7152/460370.

МЕРЗІМІНЕН БҰРЫН БОСАТУ

Тайынша аудандық соты "Е" сотталушының шартты түрде мерзімінен бұрын босату туралы өтінішін қанағаттандырды. Солтүстік Қазақстан облысы Петропавл қалалық сотының 2021 жылғы 21 шілдедегі қаулысымен сотталған, өтелмеген мерзімге 1 жыл 28 күн. Сот отырысында сотталған "Е" шартты түрде мерзімінен бұрын босату туралы өтінішті қолдады, әрі қарай ол бас бостандығын шектеу түріндегі жазаны өтеу шарттарын бұзбағанын, оған сот жүктеген барлық міндеттерді орындағанын, жазаның белгіленген бөлігін іс жүзінде өтегенін, азаматтық талаптың бір бөлігін және сот шығындарын төлегенін түсіндірді. 2022 жылдың басынан бастап ҚІБ бойынша 4 адам босатылды, сондай - ақ 2 сотталғанға қатысты сотқа шартты түрде мерзімінен бұрын босату туралы өтініш жолданды.

Осылайша, шартты түрде мерзімінен бұрын босату сотталғандарды заңға бағынатын өмір салтына ынталандырады.

Жазасын өтеуден мерзімінен бұрын шартты түрде босату мүмкіндігі сотталғандар үшін олардың оң мінез-құлқында үлкен ынталандыру болып табылады. Сүрінген адамдарда қалыпты өмірге оралу, қоғамға толыққанды азамат болып оралу үшін жақсы жаққа өзгеруге деген үміт бар.

А.О.АХМЕДЬЯРОВА,

СҚО бойынша ҚАЖД Тайынша ауданының Пробация қызметі бөлімінің инспекторы әділет капитаны.

* * * * *

ТАЙЫНША АУДАНЫ ПОЛИЦИЯ
БӨЛІМІНІҢ 2022 ЖЫЛҒЫ 2 ТОҚСАНҒА
АЗАМАТТАРДЫ ҚАБЫЛДАУ КЕСТЕСІ

Ақтанов Нұрлыжан Жақсылықұлы - Тайынша ауданының ПБ бастығы полиция полковнигі - дүйсенбі-жұма 10.00 сағаттан 13.00 сағатқа дейін, 14.30 сағаттан 18.00 сағатқа, сенбі 10.00 сағаттан 16.00 сағатқа дейін.

Аманбаев Арғын Қошқарбайұлы - Тайынша ауданының ПБ бастығының бірінші орынбасары полиция майоры - дүйсенбі-жұма 10.00 сағаттан 13.00 сағатқа дейін, 14.30 сағаттан 18.00 сағатқа, сенбі 10.00 сағаттан 16.00 сағатқа дейін.

Ыбыраев Дәурен Мәулиұлы - Тайынша ауданының ПБ бастығының жедел жұмыс жөніндегі орынбасары полиция подполковнигі - дүйсенбі-жұма 10.00 сағаттан 13.00 сағатқа дейін, 14.30 сағаттан 18.00 сағатқа, сенбі 10.00 сағаттан 16.00 сағатқа дейін.

Қасенов Қайрат Серікбайұлы - Тайынша ауданының ПБ бастығының тергеу жөніндегі орынбасары полиция подполковнигі - дүйсенбі-жұма 10.00 сағаттан 13.00 сағатқа дейін, 14.30 сағаттан 18.00 сағатқа, сенбі 10.00 сағаттан 16.00 сағатқа дейін.

Нұрахметов Марат Әмірханұлы - Тайынша ауданының ПБ бастығының кадр саясат жөніндегі орынбасары полиция подполковнигі - дүйсенбі-жұма 10.00 сағаттан 13.00 сағатқа дейін, 14.30 сағаттан 18.00 сағатқа, сенбі 10.00 сағаттан 16.00 сағатқа дейін. ПБ бастығына қабылдау жүргізіледі тел: 22-8-75.

* * * * *

200 ТЕҢГЕЛІК БАНКНОТТАР

Қазақстан Ұлттық Банкіне халықтан өтініштер түсе бастады. Азаматтардың айтуынша, кәсіпкерлер тарапынан номиналы 200 теңгелік банкноттарды қабылдаудан бас тартқан жағдайлар бар. 200 теңгелік банкноттардың заңды төлем құралы болып қалатынын еске салады. Олар 200 теңгелік монеталармен айналымда қатар жүреді және төлемдердің, банктік операциялар мен аударымдардың барлық түрі бойынша қабылдануға міндетті. Бұл банкноттарды банктер мен «Қазпошта» АҚ-ның барлық бөлімшесінде, сондай-ақ, ҚҰБ филиалдарында ұсақтауға және айырбастауға болады. Олар табиғи тозығы жеткенде ғана айналымнан алынады. Мұндай банкноттарды қабылдаудан бас тартқан тарапқа Әкімшілік құқық бұзушылық туралы кодекстің 206-бабына сәйкес әкімшілік жауапкершілік қарастырылған.

Егер сізден номиналы 200 теңгелік купюраларды қабылдасам, онда ҚҰБ-тың жақын маңдағы аумақтық филиалына хабарласу қажет. Сонымен бірге, видеоға түсіруге немесе банкнотты қабылдаудан бас тарту себебін жазбаша талап етуге кеңес береміз.

Барлық сұрақтар бойынша ҚРҰБ Солтүстік Қазақстан филиалына 55-15-27, 55-15-36 телефондары арқылы немесе Петропавл қ., Қазақстан Конституциясы к., 6 мекенжайы бойынша жүгіне аласыз.

ҒАБИТ МҮСІРЕПОВТЫҢ 120 ЖЫЛДЫҒЫНА КӨРКЕМСӨЗ ОҚУ ШЕБЕРЛЕРІНІҢ АУДАНЫҚ БАЙҚАУЫ ӨТКІЗІЛДІ

2022 жылдың 4 сәуірінде аудандық кітапхана ғимаратында аудандық мәдениет, тілдерді дамыту, дене тәрбиесі және спорт бөлімінің ұйымдастыруымен жазушы Ғабит Мүсіреповтың 120 жылдығына көркемсөз оқу шеберлерінің аудандық байқауы өткізілді. Байқауға ауданның Абай, Амандық, Большеизм, Летовочный, Чкалов, Келлер округтары мен Тайынша қаласынан үміткерлер қатысты. Байқауға аудандық мәдениет, тілдерді дамыту, дене тәрбиесі және спорт бөлімінің басшысы Г. Сағындықова, аудандық «Қазақ тілі» қоғамының төрағасы Б. Жомартов, аудандық мәдениет үйінің директоры С. Нықышев, аудандық кітапхананың мемлекеттік тіл жөніндегі редакторы С. Құрманғалиева, аудандық мәдениет, тілдерді дамыту, дене тәрбиесі және спорт бөлімінің бас маманы Р. Жұмағұлов қазылық етіп, әділ бағаларын берді. Осы байқауда бірінші орынды Летовочный ауылдық округінен Мәдениет негізгі мектебінің мұғалімі Шадетхан Ақерке, екінші орынды Чкалов ауылдық округінен Жиенбаев Думан, үшінші орынды Абай ауылдық округінен Калиева Сәуле иеленді.

Сайра ҚҰРМАНҒАЛИЕВА,

аудандық кітапхананың мемлекеттік тіл жөніндегі редакторы.



• Ғабит Мүсіреповтің туғанына-120 жыл

Ғабит Мүсірепов 1902 жылы қазіргі Солтүстік Қазақстан облысы Жамбыл ауданында дүниеге келді. Оның азан шақырып қойған аты – Ғабді әл-Ғабит. Бұл арабша "Құдайдың құлы" деген мағынаны білдіреді. Ғабит Мүсірепов қазақ прозасында өз орынын ойып алған ұлы жазушы. «Ұлпан», «Қазақ солдатты» романдары, «Ана туралы балладалар», «Этнографиялық әңгіме» қатарлы әңгімелер жинақтары бүгінгі таңда да оқырман қолынан түспейді. «Амангелді» атты бірінші қазақ киносының сценарийін жазуға өз үлесін қосты (С. Иванов, Б. Майлинмен бірге). "Махаббат туралы дастан" және екі сериялы "Қыз Жібек" фильмдерінің сценарийін жазды. 1985 жылдың 31 желтоқсанында халық жазушысы 83 жасында өмірден өтті.

ЕЛТІНЖАЛ СОЛТҮСТІКТІҢ ОРМАНЫ ЕКЕН...

Жарасбай СҮЛЕЙМЕНОВ, журналист,
Қазақстан Жазушылар одағының мүшесі.
Жалғасы. Басы газеттің №9 санында.

Жазушы тағы нені ойлауы, кімді еске алуы мүмкін? Сөз жоқ, Абайды еске алады, ұлы ұстазымен ой бөліседі, сырласады. Осы арада сөзіміз дәлелді болуы үшін Ғабенің белгілі сыншы марқұм Сағат Әшімбаевқа берген бір сұхбатында ортаға салған сөздерін келтіре кетсек, артық болмас. «Мен Абайды алпыс жыл бойы оқып келемін. Әрбір оқыған сайын жаңа ой тауып келемін, сол үшін де өмір бойы табынып келемін. Өзіңді-өзің түсінгің келсе, өзгені тереңірек танығың келсе, өмірдің терең-терең сырларына бойлағың келсе, Сұлтанмахмұт айтқандай «Абайды оқы, ерінбе». Абай – бой түземей, ой түзеймін дейтін адам үшін адамдық қасиеттің бірден-бір белгісі ойланудың, ой өсірудің құралы. Абайға табынбайтын адам – ақылға табынбайтын адам», – деген-ді ол сонда.

Абай... Ғабенің жүрегіне шоқ салған, от салған тағы кім бар? Ол, әрине, Мағжан. Мағжан Жұмабаев туралы оның «Күнделігінде» мынадай жолдар бар: «Заман алдында ақын тұр, ақын алдында заманы тұр. Ақынын түсінбесе заманға сын, заманын түсінбесе ақынға сын. Трагедиялық кризис тұсына кездесе, қоғамдық белгілі жағдайда қалыптасқан сана-сезімнің ақыны көпке дейін көңдіге алмауы, қарсылық білдіруі мүмкін».

Белгілі әдебиетші филология ғылымының докторы Бақыт Кәрібаева «Қазақ әдебиеті» газетінің 2002 жылғы 8 қарашадағы санында жазғандай, «Нәзік жанды, поэзия тәңірісі Мағжан о баста-ақ жазушы жанын жаулап, іңкәр көңілін суаттай суарып тастағандай. Әлем әдебиетінің сыр-сиқырын үздіксіз зерттеп, көркем таным тасын өрге домалата беруі де

Мағжан ықпалы болуы әбден мүмкін». Иә, осы ұлы екі тұлғаның қос өрім болып тарих бәйгесіне қосылғанын айғақтайтын мысалдар жетерлік. Ол үшін Ғабенің Мағжан шығармашылығына ол ақталмаған кездің өзінде-ақ ден қойғанын айтсақ та жеткілікті. Ақын шығармаларын ауызға алуға болмайтын сол бір үрейлі кездің өзінде Ғ.Мүсірепов Мағжан жырларын қойын дәптеріне жазып отырған. «№337 дәптерінде Мағжан Жұмабаевтың атақты «Шолпы» өлеңінің мәтінін толық жазып, аяғына 1975 жыл деген уақытты көрсетіпті. Сол дәптерде Мағжанның «Толқын» аты өлеңінің, №338 дәптерінде «Гүлсім ханымға» атты өлеңінің мәтіндерін жазып қойған. Мағжанға тыйым салынған қатал дәуірдің өзінде-ақ Ғабит Мүсірепов ақын шығармасының құдірет-күшіне сүйсіне, табына отырып, оны қадірлей, құрметтей білген. Сол бір аса қиын-қыстау кезеңде ешкімнен қаймықпай, сескенбей, әдебиет туралы, оның дарынды өкілдері жайлы өз жүрегінің сенімінде ой-толғамдарын қағазға түсіріп отыруы Ғабит Мүсіреповтің азаматтық тұлғасының ірілігін, дарынының биіктігін, құдіреттілігін, тазалығын, болжампаздығын, қаһармандығын танытып, дәлелдейтін болса керек». (Ә. Нарымбетов «Ғабит Мүсіреповтің қойын дәптерлері», «Қазақ әдебиеті», 1993 жыл).

Алыстан қарауытып көрінетін қалың орманның бауыры мың түрлі асыл шөптерімен, қызылды-жасылды гүлдерімен қалай құлпырып тұрса, жолдың орта тұсы ойдым-ойдым алаңдарымен, қарағайдай тұзу жуан-жуан ақ қайыңдарымен көздің жауын алады. «Едәуір ұзын орманның күнгей жағы қалың

қара шие, жортып өтсең де ат шашасын қызылға бояп жіберетін жидек пен бүлдірген. Екі жағындағы екі өзекте де жуа өседі, аралар ұялайды. Шөбі де қалың» (Ғ. Мүсірепов).

Ғабенің ауылға келген сайын осы өңірді асықпай аралап, керемет бір күй кешеді екен. Бірде Елтіңжалға сұғына кірген көзі шоқ қайыңның арасында өсіп тұрған жалғыз шыршаға түседі. «Бұл араға қарағай қалай келді екен, әлде біреу отырғызды ма?» – деп сұрайды Ғабенің қасындағылардан:

Жұрт аң-таң. «Айдалаға кім қарағай отырғызады?! Табиғаттың тағы бір құпиясы да». Ғабенің жас шыршадан көзін ала алмай біраз тұрады да, Алматыдан өзімен бірге келген інілері Мақсұт Әубәкіров пен сазгер Жоламан Тұрсынбаевқа: «Сәукеле, шапан, бүрмелі көйлек киген сұлу бойжеткендей сыланyp тұрған мына қыз қарағайға бір ән жазыңдар», – дейді.

Ағаның сөзін інілері екі еткен бе, кешікпей ән жазылып, оны 1981 жылдың қазан айында қазақтың бұлбұл атанып кеткен атақты әншісі Бибігүл Төлегенова республикалық радиодан орындайды.

Осы арада Ғабенің ықыласына бөленген Мақсұт Әубәкіров пен Жоламан Тұрсынбаев туралы аз-мұз әңгімелей кетуді жөн көріп отырмын. Бұл екеуі де Елтіңжалға Ғабенің еріп талай келген. Сол кездері сырттай қарап, қызығушы едік, кейін жақынырақ танысудың сәті түсті. Оның өзі – бір қызық әңгіме. Кеңес заманында Алматыда басшы қызметкерлерді даярлайтын жоғары партия мектебі болды. Сол мектептің жанындағы біліктілікті арттыру курсына жергілікті партия, кеңес қызметкерлерімен бірге журналистер де барып жүрді.

Бірде Алматыға қызмет арқылы танысып, кейін туыстай болып кеткен Солтүстік Қазақстан облыстық партия комитетінің партиялық жұмыс бөлімінің нұсқаушысы Сайын Есенғұловпен жолымыз бірге түсті. Түске дейін дәріс тыңдаймыз, бос уақытта қала аралаймыз. Жоғары оқу орнын Алматыда тамамдаған Сайын қаланы бес саусағындай біледі. Оның үстіне кезінде бір мектепте оқып, кейін бір ұжымда бірге қызмет істеген Шашубай Малдыбаев осында оқып жатыр. Қолы босаса болды, ол да бізге қосылып кетеді. Осылай өтіп жатқан күндердің бірінде Шашубай біздің бөлмемізге өзіміз шамалас бір жігітті ертіп келіп: «Жоламан Тұрсынбаев – біздің жерлесіміз», – деп таныстырды. Сайын танымаса да, мен оны сырттай жақсы білетінмін. Есіл (бұрынғы **жалғасы 4-бетте**

ҚҰТТЫҚТАЙМЫЗ!

Тайынша қаласының кішкентай ғана тұрғыны

КЕҢЕС

Айсұлтан Нұрланұлы

сәуірдің 10 жұлдызында 1 жасқа толады.

Немеремізді туған күнімен құттықтаймыз!

«Балам – балым, немере – жаным», деген қазақпыз ғой, әулетіміздің жалғасы – өсіп келе жатқан кішкене балапанымыз елінің арқа сүйер үлкен азаматы болсын. Бақытты балалық шақтан аман-есен өтіп, есейіп ер жетсін, ата-анасы мен ағайын – туыстың мақтанышы болсын.

Атасы мен әжесінің қазір еркесі, ертеңгі күндері қамқоршысы болады деп үміттенеміз!

*Бұл дүниенің ең қызығы немере
Қанат жайып өсе берсін кереге.
Шаңыраққа уық болып шаныштып
Келе берсін немере мен шөбере.*

*Оның иісі елден ерек тамаша
Жүрегінің соғуы да жаңаша.
Шайға салған қант секілді ерісің
Ата деген бір сөзіне балаша.*

*Сұрағанын іздеп тауып бересің
Шаршасаң да, жүрші десе, ересің.
Барған жерде қонақтардан ұялмай
Дастарханнан кәмпиттерді тересің.*

Немересіне ақ тілегін жодаушылар:
атасы Кеңес Тақышұлы, әжесі Зейни Төлегенқызы.
Тайынша қаласы.

* * * * *



Үй сатамын. Үйдің жағдайы жақсы. Ауласы кең, үйдің ішінде барлық жағдай жасалған. Үйдің бөлмелері кең, жарық, биік. Сатылатын баға келісімді. Байланыс телефоны 87078352668

* * * * *

ВЕТЕРИНАРЛЫҚ ДӘРІХАНА “Жуматов М.С.” ЖК

Сериясы ВП №000593 лицензия ҚР Ауыл шаруашылығы министрлігінің Солтүстік Қазақстан аумақтық басқармасымен берілген

ЖЕКЕ ВЕТЕРИНАРЛЫҚ ДӘРІГЕР

Сериясы ВП №004124 лицензия ҚР Ауыл шаруашылығы министрлігінің Солтүстік Қазақстан аумақтық басқармасымен берілген

Үй құстарына, атап айтсақ бройлер, үйрек және қазға арналған Ресейде өндірілген дәруменді жем-азықтарды сатады. Сатылымда құстар арасындағы инфекциялық ауруларға қарсы құралдар да бар.

Мекенжайы: Тайынша қаласы, Қазақстан Конституциясы көшесі, 294 және Пролетар көшесі, 291-1 тел. 87779217555.

ЕЛТІНЖАЛ СОЛТҮСТІКТИҢ ОРМАНЫ ЕКЕН...

Жарасбай СҮЛЕЙМЕНОВ, журналист,
Қазақстан Жазушылар одағының мүшесі.

Ленин) ауданындағы Жекекөл ауылының тумасы, Петропавл педагогика училищесінің музыка бөлімін, кейін Алматыдағы музыкалық консерваторияны тамамдаған, КСРО композиторлар одағының мүшесі.

Сірә, Сайын да, мен де бірден ашыла қоймайтын тұйық жандармыз. Ал Жоламан ашық екен, ашық болғанда да, кәдімгідей төбеден түскендей қойып қалады. Ол қоштасарда: «Жерлес болып шықтыңдар ғой, алдағы бейсенбі күні біздікіне қонаққа келіңдер», – деді. Сайын екеуміз аң-таң болған күйі қала бердік.

– Өзі қызық жігіт екен, – дейді Сайын. – Әй-шай жоқ, қонаққа шақырып кетті, ғой.

– Рас, алдымен үйдегі кісімен ақылдасып алмай ма?!

– Соған қарағанда, жай айта салған сөз болуы да мүмкін...

Бейсенбі де келді. Таңертең сабаққа бармақшы болып жиналып жатыр едік, телефон шылдыр ете қалды. Ар жақтан дауыс саңқылдап естіліп тұр, «Жоламанмын» – дейді. Сайын, сірә, Жоламанмен танысқанын ұмытып қалған ба, «кім, кім?» – деп қайта-қайта сұрайды. Трубканы орнына қойған соң «әнеугі жігіт, сағат жетіден кешікпеңдер», – деп жатыр деді.

– Үйінің адресін айтты ма?

– Шашубай біледі, сол алып келеді», – деді.

«Сынықтан басқаның бәрі жұғады», – дейді ғой, Сайын сияқты мен де қонаққа кешігуді білмеймін. Айтылған уақытта Жоламан үйінің табалдырығынан аттадық. Құшағын жайып, алдымыздан шықты, зайыбымен таныстырды. Ол кісі: «Жаңа пәтерге жуырда ғана көшіп едік, әлі жинап та үлгере алмай жатырмыз», – деп ақтала сөйледі.

Қонақ бөлмеге оздық. Үстелді есіктен төрге дейін жасап тастапты. Сайын «Бізден басқа да қонақтар бар сияқты ғой», – деп жатыр. Кешікпей тағы екі кісі келді. Дастарқанның басына отырғаннан кейін үй иесі оларды бізге, бізді оларға таныстырды. Ұзын бойлы, ақ сары кісі Мақсұт Әубәкіров екен, ол кезде Қазақстан компартиясы орталық комитетінің сектор меңгерушісі болуы керек, аты-жөнін айтқаннан кейін Сайынды бірден тани кетті. Қасындағы орта бойлы жұқалтай келген, қара торы жігіт ағасы, ол да біздің жерлесіміз, ақын Жарасбай Нұрқанов болып шықты.

– Жөке, дастарқанды кең жайыпсың ғой, тағы да біреулер келуші ме еді? – деді Мәкен.

– Жоқ, жерлестер кең отырайық дегенім ғой.

Расында да, сол кеште Жөкең үйінде кең де ұзақ отырдық. Қазақ: «Аузын ашса, көмекейі көрінеді» дейтіндей, ақкөңіл жан екен, барын аузымызға тосып, кеткенше бәйек болды. Жайшылықта біреуге баға беруге келгенде асыға қоймайтын Сәкең таксиге отырып жатып «өзі бір ер жігіт екен», – деді.

Жоламан Тұрсынов, шынында да, ер жігіт екен. Оған кейін көзім талай рет жетті. Астана Алматыдан Ақмолаға ауысқаннан кейін біздің қарым-қатынасымыз, тіпті, жиілей түсті. Мәдениет және ақпарат министрлігінде жауапты қызмет істейтін Жөкең елге келген сайын хабарласпай кетпейтін.

Жоламан Тұрсынбаев – күрделі дүниелер жазған еліміздің музыка әлеміндегі белгілі тұлға. Оны алматылықтар да, астаналықтар да жақсы біледі. Бір қызығы, оның есімі өзінің жерлестеріне жақсы таныс

емес. Маған осы бір жай үлкен олқылық сияқты көрінуші еді. Соның орнына толтырсам деген ниетпен Жөкеңнің алпыс жылдығы қарсаңында (2005 ж.) облыс әкіміне хат жазып, елімізге белгілі композитордың шығармашылық кешін өткізу туралы ұсыныс жасаған едім. Алайда, неге екенін білмеймін, қолдау болмады. Өзгелерге келгенде шашылып-төгілуге даяр тұратын мәдениеттің тізгінін ұстап отырғандардың дәл сол жолы тарылып, өз ұлын өзекке тепкеніне әлі күнге өкінемін.

«Қызқарағайдың» сөзін жазған Мақсұт Әубәкіров те өте білімді, сан-қырлы талант иесі еді. 1986 жылғы желтоқсан оқиғасынан кейін Қазақстан телерадиокорпорациясының төрағасы болып тағайындалған марқұм Сағат Әшімбаев оны өзіне бірінші орынбасар етіп алды. Мен Мәкенмен нақ, осы кезде жиі араласа бастадым. Оған себеп болған төрағамыз Сағат Әшімбаевтың өзі. Ол кісі біздің облыста іссапарда болған кезде үш күн қасына еріп жүріп, біраз жайға қаныққан едім. Сәкең Алматыға қайтарында Қызылжар әуежайының басында: «Қызметке шақырсам, Алматыға келесің бе?» – деп маған күтпеген сауал тастады. Қапелімде не дерімді білмей жауаптан тосылып қалдым. Кейін осы мәселе бойынша Мәкеңе тапсырма беріп, маған хабарласуын сұрапты. Мен Мәкеңе үйреніп қалған ортамды тастап Алматыға баруға жүрексінетінімді жеткіздім. Ол кісі де: «Ойлан, бір шешімге келіп жатсаң хабарлас, кештік етпейді», – деп мені асықтырған жоқ.

Ақыры не керек, сол кісілердің қолдауымен қазақ радиосының Солтүстік Қазақстан облысындағы меншікті тілшісі болып тағайындалдым. Қазақ радиосының 60 жылдығына қарай Алматыда өткізілген салтанатта Абай атындағы театрдың фойесінде кездесіп қалған Сәкеңнің бұрылып келіп: «Алматыға келмесең де біздің ұжымға мүше болдың, таяуда Петропавлға келемін, сонда ақылдасамыз», – дегені әлі күнге есімде. Осы бір жылы сөздерге төбем көкке жеткендей қатты қуандым. Алайда, тағдыр бізге қайта кездесуге жазбапты. Кешікпей сұм ажал қазақтың тағы бір аяулы ұлын арамыздан алып кетті.

Өкінішке қарай, Мақсұт Әубәкіровтің өмірі де қысқа болды. Бірақ есімі ұмытылып жатқан жоқ, «Қызқарағайы» қазақтың кең даласын шарлап жүр.

Ауылында бар ағаның қызқарағай,
Тал бойында бір мін жоқ қыз баладай.
Ақ балтырлы аққайың арасында,
Жалғыз өсіп, асқақтап, тұр дарағай.
Қызқарағай, қызқарағай...
Жалғыз өсіп, асқақтап, тұр дарағай.

Ауылында бар ағаның қызқарағай,
Қызығамыз көркіне біз баладай.
Аясынан жаныңыз сая тауып,
Оған мәңгі ұл мекен қыз қарағай.
Қызқарағай, қызқарағай...
Оған мәңгі ұл мекен қыз қарағай.

...Қыс өтіп, көктем келді. Жер-дүние жасарып, жайнайтын, табиғат түлейтін кез. Елтіңжалдың да бүгінгі реңі өзгеше. Ол ертең, тіпті, құлпырады. Жапырағы жайқалған қайың-терек сыбдыр қағып, наурызда туған науан ұлға сағынышын жеткізеді.

* * * * *

Тайынша ауданы әкімінің аппараты

ВИКТОР ИВАНОВИЧ ГЕРТЕРДІҢ қайтыс болуына байланысты отбасы мен туған-туыстарына **КӨҢІЛ АЙТАДЫ.**

Меншік иесі: «Тайынша таңы» жауапкершілігі шектеулі серіктестігі.

Газет аудан әкімінің қолдауымен шығып, мемлекеттік ақпараттық саясатты жүргізу жөніндегі ресми басылымы болып табылады.

Индекс: 65710

Газет әр аптаның жұма күні шығады.

Директор -
Бас редактор
Гүл НУРАЛИНА



Қазақстан Республикасының Мәдениет, ақпарат және спорт министрлігінде 2005 жылғы 14 желтоқсанда тіркеліп №6652-Г куәлігі берілген

Газет «Тайынша таңы» жауапкершілігі шектеулі серіктестігінің компьютерлік орталығында теріліп, беттеліп, «Старкова А.А.» ЖК-де офсеттік тәсілмен басылған 020000. Көкшетау қаласы, Әуелбеков көшесі, 98 үй.
Тапсырыс 115. Таралымы 1300.

МЕКЕН-ЖАЙЫМЫЗ:

Солтүстік Қазақстан облысы, Тайынша қаласы, Қазақстан Конституциясы, 206-үй.

БАЙЛАНЫС ТЕЛЕФОНЫМЫЗ:

8 (715 36) 23-8-51

Жарияланған мақала авторларының пікірлері редакция көзқарасын білдірмейді. Қолжазба қайтарылмайды. Келген хаттарға жауап жолданбайды. Жарнаманың, келіп түскен материалдардың мазмұны мен мәтініне хабарлама беруші автор өзі жауапты.